

**ŠUMARSKI
ZAKONI I PROPISI**

**SARAJEVO
1949**

ŠUMARSKI
ZAKONI I PROPISI

Izdanje :
»NARODNOG ŠUMARA«
Sarajevo 1949

Uredili:

Ing. H. Bujukalić i D. Šimunić

Predgovor

Već dugo vremena osjeća se potreba za izdavanjem zbirke važećih propisa iz područja šumarstva i drvne industrije. Tu potrebu podjednako osjećaju šumarski organi kako u preduzećima i ustanovama, tako i u narodnim odborima i ministarstvima. Našim šumarskim školama i kursevima također je potrebna pomenuta zbirka.

Uviđajući tu potrebu, Ministarstvo šumarstva povjerilo je izdavanje ove zbirke Uredništvu lista »Narodni šumar« koje, evo, taj zadatak izvršava.

Pri sastavljanju zbirke Uredništvo se je rukovodilo potrebom da u istu uđu savezni i republički propisi koji su sada od praktične primjene, dok su ostali propisi samo navedeni u posebnom registru. U pogledu propisa koje su donijeli i savezni i republički organi, u zbirku su unešeni samo republički propisi, dok su savezni propisi ili samo navedeni u posebnom registru ili su donešeni samo djelomično t. j. samo one odredbe koje nisu regulisane republičkim propisom. Neki propisi kod kojih su naknadno uslijedile izmjene i dopune ušli su u zbirku sa izvršenom izmjenom i dopunom. Također su izvr-

šene ispravke štamparskih grešaka koje su naknadno konstatovane u službenim listovima. Broj i datum službenog lista u kojem je propis objavljen označen je u registru na kraju zbirke.

Savezni propisi štampani su jezikom i narječjem iz »Službenog lista FNRJ« u srpskom (ćirilskom) izdanju, dok su republički propisi štampani onako kako su objavljeni u »Službenom listu NR BiH«.

Ministarstvo šumarstva NR BiH i Uredništvo lista »Narodni šumar« nastojaće da se u dogledno vrijeme izda i druga zbirka kojom će biti obuhvaćeni propisi iz područja šumarstva i drvne industrije donešeni nakon izdavanja ove zbirke.

UREDNIŠTVO

Sarajevo, decembra 1949 godine.

19489

I

ZAKON O ŠUMAMA

I — Opšte odredbe

Član 1

Sve šume u Narodnoj Republici Bosni i Hercegovini, bez obzira u čijoj su svojini, služe opštim interesima narodne zajednice i nalaze se pod zaštitom države.

Član 2

Pored šuma smatraju se šumama u smislu ovog zakona i zemljišta:

- 1) koja nisu trajno sposobna za drugu vrstu kulture osim za gajenje šuma i
- 2) koja po svome položaju, konfiguraciji, fizičkom i hemijskom sastavu i klimatskim uslovima najkorisnije služe narodnoj privredi i drugim opštim interesima kada su pod šumskom kulturom.

Član 3

Po značaju šume su opštedržavnog, republikanskog i lokalnog značaja.

Propisi Opšteg zakona o šumama određuju koje se šume smatraju šumama opštedržavnog značaja.*)

*) Opšti zakon o šumama, u članu 3 st. 2 propisuje:

»Prezidijum Narodne skupštine FNRJ, na predlog Vlade FNRJ, ukazom određuje koje će se šume smatrati šumama opštedržavnog značaja.«